

SCOLA E TERRITORIE

I trofei più bie é nasciui tel Liceo Artistich

Lorenza Cloch à ideà l'recognisciment prezios per la atletes. La Scuola de Fascia à realisà ence l' trofeo de Copa Europa, pissà da la studenta-atleta Irene Tabanelli

La bela colaborazion anter la Scuola Ladina de Fascia e l' teritorie, frut de egn de lurier e de raporç, se à renovà chest an sot la vida del sostitut sorastant Claudio Valentini, con na gaissa amò maora per chest apuntamento mondial che segna n' vèrch concret te l'ensomech che la val à chieri e portà inant per egn.

«L'Comitat de la Copa del Mond e l'APT de Fascia – ne à dit la referenta del Liceo Artistich G. Soraperra, professoressa Barbara Fanton – ne à domandà la colaborazion per meter a jir n' concors anter i student per la realisazion di trofei da ge sporjer a le atlete che fossa ruade sul podie de la gare de Copa del Mond sun Sèn Pelegrin.

Dò l'aproxazion del departiment de le materie artistiche, la proponeta ge è stata portada dant ai student

di ultimes egn de scola de la 5^a design e de la 4^a, che l'è na clas articulada de figuratif e design, dai professoress Franco Ghetta, Flavio Tessadri, Tiziano Deforian e Andrea Dorigatti.

No l'era n' muie de temp ajache i modelins aessa cognù esser vertesc per la metà de firé, per la conferenza stampa de presentazion de l'event. I bec à lurà su la projetazion, en part te scola e en part a ciasa, ajache i è en prejenza a setemane alternade, chi de 5^a più che auter en grop e chi de 4^a emze più a livel individual. Con l' sorastant Claudio Valentini e i insegnanc aon fat na pruma selezion e aon tout fora 6 projec da olache te pec dis l'è stat realisà i modelins de legn, plexiglas e i materiali che se podea lurar te scola, de gra al didament fontamental di

tecniche del laboratorie, Gianantonio Bettiga e Mirko Decrestina e del professor Claus Soraperra.

L'è stat na bela esperienza – fenesc fora la prof.a Fanton – i student à fat dalvers, i è contenc e chesta l'è na sodesfazion ence per i insegnanc e per duta la scola.»

La Comision à cernù l' trofeo

Per cerner l' trofeo ofiziel per la Copa del Mond n' domesdi del meis de firé l'è ruà te la senta neva del Liceo na Comision con l' president del Comitad organisador Andrea Weiss, l' secretèr generel Cristoforo Debertol e l' president del Comitad FISL del Trentin Tiziano Mellarini. I responsaboi e referenc de la scola ge à presentà i modelins, i professoress ge à portà dant e despiegà

Legn di lèrjes de nesc bosc, pera de dolomia e vierech lizech e lujent desche la giacia de l'invern. E dapò la corona de Re Laurin, i spic de noscia crepes e l' podie, obietif de ogne campion. E amò i loghi de «Val di Fassa» e de la FIS. L' trofeo che ge vegnarà dat a la venjodores de la garejèdes de Copa del Mond te Fascia tol ite, a na vida neta e essenziela ma de gran parbuda, duc chisc element.



projet e la Comision à cernù chel realisà da Lorenza Cloch, studenta de la 4^a clas.

Simboli e materièl del trofeo

L' trofeo l'è stat cernù per sia bela parbuda e sia capacità de tor ite n' muie de segnificac con n' design stilisà e essenziel, e con gran atenzion ai materièl: l' legn di lèrjes de nesc bosc, la pera de noscia crepes dolomitiche e l' vierech lizech e lujent desche la giacia de l'invern.

Te anter i doi toc de legn spic che se auza envers l' ciel per raprejentèr i crepes, l'è doi element de vierech che raprejenta na corona: chela de Re Laurin, simbol de lejendes e cultura ladina, ma ence de la storia de la competizioni da d'invern de Fascia e Moena, e amò

simbol de la corona che jirà sul cel de la venjodores de la garejèdes su La VolatA.

Chisc element è poje sun n' basament a trei sciaeres che raprejenta l' podie, obietif de ogne campion: i doi sciaeres più basc i è de bel legn de lèrsc massif, chel sunsom, l' più prezios del prum post, de staifa pera de dolomia.

Dò l' prum modelin realisà te scola con legn e plexiglas, i trofei definitives è stac portè a compiment chisc dis passè dò l' lurier specialisà per aer l' sas e l' vierech de spessor giust, molé dalvers e con l' incijon di loghi tel vierech. I è stac realisè te trei mesures: auc 60 zentimetres per l' prum post, 55 per l' secondo e 50 per l' terzo post de ogne garejèda.

Lucia Gross



I modelins di trofei enjgnè dai student.



I organisadores de l'event à cernù l' trofeo.



Referenc e insegnanc de la Scuola de Fascia e del Comitad de endrez de la Copa del Mond dedant ai trofei realisè dai student.



L' trofeo realisà da Lorenza Cloch.



I professoress ge à moscià e despiegà i projec ai comembres de la Comision.

«È tout ispirazion da nosc ambient»

Lorenza Cloch l'è na tousa da Pera che fèsc l' 4^a an te la clas del Liceo artistich olache l'è tant student che à cernù l' percors design che student che à cernù l' figuratif. Ela fèsc design. Per capir coche l'è nasciù su trofeo ge l' aon domandà direttementer a ela.

«Canche dò le feste da Nadal sion endò jic a scola – la ne à dit

– nesc professoress ne à proponet de far n' projet per n' bel trofeo per le venjodores de cheste gare. Al scomenz gio no sae che far. Ge è pissà per dotrei dis, n'è rejonà ence a ciasa per cerir valch idea, è vardà fora publicazion ma no è troà l' ispirazion gusta. Dapò pian pian è pissà a chel che aon entorn de emportant e è proà a me lasciar ispirar da l' ambient e da si element, desché l' legn di albres, l' sas de dolomia e dapò la giacia e la neif per l' invern che podea esser raprejentada dal vierech.»

Franco Ghetta e Fiorella Brunel. I tempes i era piutost strence e aon lurà mingol a scola e mingol a ciasa, perché fajon lezion te clasc na setemana sci e una no, donca se jia inant ence a ciasa e dapò canche se jia a scola ge fajaame veder ai professoress coche jia inant l' lurier. Aon fat dant l' dessegn e dapò per far più en prescia l'è stat l' laboratorie coi tecniche che à realisà i modelins che dapò i è stat presentè a la Comision.

Co te troeste a jir a scola a mez temp?

Gio con la didatica al 50% te clasc me troe ben, perché da ciasa sion più bona de me concentrar e meter l' atenzion a la lezion senza le distrazion che valch outa l'è te clasc, però da l' autra man cosci posse veder i amic amancol dò na setemana.

L'è da te far l' compliment perché t'as troà na bona sintesi anter segnificac e aspet estetiche. Este contenta?

Ei, son dalbon contenta de chest resultat. Me saessa bel jir a veder le gare e le premiazion, ma no peisse che sarà possibil. 16

Na studenta-atleta à pissà sie ensomech

Apede al trofeo per la Copa del Mond, la Scuola Ladina de Fascia à abù l' met de meter a la leta l' frut de sie lurier creatif e artistich ence per n' auter event, la Copa Europa che bele pech dò l' event maor, avisa ai 2 e 3 de mèrz, chiamarà endò sul portoi La VolatA de Sèn Pelegrin la atletes miore del mond



L' trofeo per la Copa Europa di 2 e 3 de mèrz.

per doi garejèdes de SuperG che recupera proes en program te la Sarntal.

L' Ski Team Fascia, con sie president Leonardo Bernard, dò aer vedù i bie lurieres realisè dai student de la Scuola del teritorie l'è domandà de poder aer ence l' trofeo per chest event.

Chest'outa a se tor fora de anter l'è stat n' trofeo che moscia vegnir fora da n' cerchie desche na medaa na schiadora en posizion atletica e plastica che somea belapontin te chela de taèr l' travert de sia garejèda.

Ence chest'outa a realisèr chest projet l'è stat na tousa, na joena studenta de la 4^a clas che fèsc l' percors LAF, donca figuratif, Irene Tabanelli. Da sottrissèr te chest cajo l'è l' fat che Irene l'è na studenta del Ski College, n' joen talent del schi alpin che te chest trofeo l'è donca podù raprejentèr se ensessa e sie ensomech de n' davegnir lumenos tel schi agonistich.

Chisc trofei per la Copa Europa i sarà duc de la medema mesura ma con la schiadora de or, de arjent e de bron. La Scuola de Fascia la è dò a realisèr chisc dis. 16



Lorenza Cloch.